

Saturday, December 20, 2025

Time - 2:30pm - 2:35pm

AKASHVANI AIZAWL
REGIONAL NEWS UNIT

GOVERNOR

Larsap General (Rtd) Vijay Kumar Singh chuan Krismas chu Khawngaihna leh lainatna lantirna hun a nih thu sawiin, zonun zemawi Tlawmngaihna a kentel tlat avangin Christmas leh Mizo khawtlang nun chu inhmeh thu a sawi.

Krismas leh Kumthar puala thuchah a sawina ah he thu hi a sawi a, Larsap chuan Kum dang ang bawkin tlangram ngainatawm takte chu carol thawm rivain a tuam chhuak tih sawiin inpumkhatna chu mawi takin a eng chhuak mek a ti a, Krismas chu zonun zemawi ‘Tlawmngaihna’ parchhuahna hun, rinna, inpawlhona leh midang tana luanchhuahna thinlung mitinte'n an put hun a ni tih a sawi.

Larsap chuan hunpui pualin tunhma zawng aia nasa zawka mirethei leh chanhai, riangvai, damlo leh baihvaita tana malsawmna nih tum theuh turin mipuite a chah a, hmangaihna leh remthu thlen tirtu nih tum theuh turin a chah a ni.

Larsap chuan In chhung luma chhungte kianga hunpui hmang ve thei lo tur midangte tana rawngbawlna hna thawk mek - Dan leh thupek kengkawhtu, ram venhim hna thawktu, Doctor, Nurse leh nitin mamawh phuhru tura duty zawng zawngte zahna chibai a buk tih sawiin an inpekna avangin hunpui hlim takin an hman theih phah a ti a, Mizo thalaite chakna thahrui, theihna leh duhthusamte chu hmalam hun hriltu a nih avangin, he hunpui lo thleng hian an thiamna leh theihnate tipung se a duh thu sawiin an khawhawi tizauin hmabak eng tak Mizoramin a neiha, India ram chak zawk siam a nih theih nan rah tha chhuah se ngei se a duh thu a sawi bawk.

Larsap chuan Kumthar an chuankai hunah inpumkhatna leh mawhphurhnate chu tha taka vawng nung chhunzawm zel turin mipuite a chah a, India rama boruak thianghlim ber State ni zel thei tura tan la tura mipuite chahin Mahni mihringpui mai bakah thilnung dang leh leilung tana him lote ti lova hunpui lawm theuh turin mipuite a chah a ni.



LOK BHAVAN CHRISTMAS CAROL SERVICE

Larsap General (Rtd) Vijay Kumar Singh leh Nupui Pi Bharti Singh chuan nizan khan Lok Bhavan-ah Aizawl West-I Area Masihi Sangati, Mizoram

Presbyterian Church member-te mikhualin Christmas Carol Service hun hlimawm tak an hmang.

Larsap General chuan Christmas chu mitin huapzo leh hmun tina ngaihhlut hlawh a nih thu sawiin, he hun hi thinlung kawngkharte hawnga midangte tana malsawmna ni tura luanchhuahna, sum leh pai mai ni lo neih thil remchang hmanga phal taka midangte tanpuina hun a ni, a ti a. Khawngaihna leh lainatna lanitirna hun a nih thu sawiin, zonun zemawi Tlawmngaihna a kentel tlat avangin Christmas leh Mizo khawtlang nun chu inhmeh a tih thu a sawi a. Larsap chuan Christmas lo thleng tur chuan remna leh muanna bakah inunauna thlen se a duh thu a sawi bawk.

He hunah hian Rev Lalhunthara, i/c Aizawl West Area Masihi Sangati hnen atangin thuchah ngaihthlak a ni a. Aizawl West-I Area Masihi Sangati, Mizoram Presbyterian Church member leh Standing Choir te'n Krismas hla mawi tak tak an rem a. Larsap te nupa hnenah Krismas thilpek an hlan a. An ni pawhin he hun hmanpuitu Aizawl West-I Area Masihi Sangati member-te chungah lawmthu sawiin Krismas thilpek an hlan a ni.



CYMA : KSD ROAD

Central YMA chuan Sihphir kaltlanga Kawnpui leh Durtlang kawng (KSD Road) siamtu BRTF hotute leh Contractor te hna tha zawk leh chak zawka thawk turin hrilh.

Nimin khan khan, Central YMA OB-te leh CYMA Road Monitoring Committee ten lenga an sawm angin, BRTF (Project Pushpak) hotute leh Contractor, BRN Infrastructures Pvt. Ltd. hotute chu CYMA Office-ah kal, hna tha zawk leh chak zawka an thawh dan turte sawiho pui an ni.

KSD Road siam mek hi a that loh em avangin, hemi kawngin a paltlang khuaa YMA Branch-te chuan CYMA-ah an lungawi lohna an thlen a. Hemi bawhzui nan CYMA Road Monitoring Committee Member-te chuan December 16, 2025 khan kawng siamtu BRTF hotute leh Contractor te nen Joint Inspection an lo nei tawh a. Hemi tum hian Contractor-in tha zawka hna a thawh dan tur mumal zawka a a ruahman hma chuan, hnathawk chhunzawm tawh rih lo tura tih a ni.

Thutkhawmah hian BRTF leh Contractor te chuan an ruahmanna thar leh, hna tha zawka an thawh dan tur ruahmanna an siamte an sawi a. CYMA hrutute chuan chak taka hna thawk chhunzawm nghal tur leh; an hnathawh that zawng leh thawh chin a hmuna endik leh turin nakkum 2026 January ni 10 chu a ruat nghal a ni.



MAMIT END

Mamit Excise & Narcotics department chuan kumin chhungin ruihhlo kaihhnawih thubuai 313 ziaklut tawhin nikum aiin kuminah ruihhlo kaihhnawih thubuai ziahluh leh mi man an tlem zawk.

Mamit Excise & Narcotics department ah hian Kumin January ni 1 atanga vawiin thleng khan thubuai 313 ziah luh niin ruihhlo kaihhnawihah mi 219 man tawh an ni a, hetih lai hian nikum khan ruihhlo kaihhnawih thubuai 356 ziahluh niin ruihhlo kaihhnawihah mi 250 man an ni thung a ni.

Mamit Excise & Narcotics department te chuan kumina thubuai an ziahluh zinga tam ber chu Zu kaihhnawih ani an ti a, kumina an man zat hi Rakzu litres 1937.9, zubilh lai Tin 4881, Heroin grams 49.080, Ganza grams 3024 leh ruihtheih thil dangte an man bakah lirthei 7 a ni.

